

Lita Nampa 1 Paulalu Walkatjura

Iyantja Wati Ini Timitjilakutu

1 Timothy

Nyangatja Nganmanytju Nyakula

Wangkanytjaku

Nyangatja Godaku tjukurpa Paulalu walkatjunkunytja wati yangupala ini Timitjiku. Panya paluru Paulaku katja purunypa munu pula ngura tjuatakutu ankula tjungungku alatjitu Godaku tjukurpa para-pitjalira wangkapai anangu tjuangka. Ka ngula Timitjinya kutju anu ngura ini nyanga tjanalakutu Pariyala, Tjitja-lanikala, Karintjala tjanalakutu munu ngura nyara palula tjanala paluru Jesuku walytja tjuṯa nyangangi.

Munu palula malangka paluru anu tawunu pulka ngura ini Ipitjalakutu nyara palula nyinara Jesuku walytja tjuṯa atunymankunytjikitja. Ka lita nyangatja Paulalu palumpa walkatjura iyanu ngura nyara palula paluru Jesuku walytja tjuṯa atunymara kanyinnyangka. Munu paluru Timitjila tjakultjunangi tjukurpa kutjupa kutjupa tjuṯa paluru kulira Jesuku walytja tjuṯa tjukarurungku atunymankunytjaku. Munu paluru wangkangu palula, “Anangu palya mulapa kutju ngurkantara tjura Jesuku walytja tjuṯa atunymankunytjaku.”

Ka ngura nyara Ipitjala wati kutjupa tjuṯangku tjukurpa ngunti tjuṯa tjakultjunangi anangu panya Jesuku walytja tjuṯangka. Ka palulanguṯu Paulalu Timitjila lita nyangangka wangkangu tjukurpa palunya tjananya wiyantjaku munu tjukurpa tjukaruru kutju wangkara nintintjaku Jesuku walytja tjuṯangka tjana kulintjatjanu tjukarururingkunytjaku. Munu piruku

Timitjinya wangkangu wirura tjukaruru palyanyku nyinanytjaku tjukurpa paluru wangkanytjtja kutju kulira.

Tjukurpa nyanganpa ngarinyi:

1:1-2 Paulalu ngaṅmanytju wangkanytja

1:3—2:15 Paulalu wangkanytja Jesuku walytja tjuṭa yaaltji-yaaltji nyinanytjaku

3:1-16 Jesuku walytja tjuṭa aṭunymankunytjakuya wati palya ngurkantanama

4:1—6:21 Paulalu Timitjila wangkanytja warṅa kutjupa kutjupa tjuṭa palyantjaku Jesuku walytja tjuṭaku

Paulalu Ngaṅmanytju Wangkanytja

¹⁻² Uwa, Timitji, ngayuluṅa Paulalu lita nyangatja nyuntumpa walkatjunanyi. Panya Mama Godalu pula Jesulu Christaluṅi witura iyaṅu Jesuku tjukurtjara warṅarinytjaku. Panya Godalulanya wankaṅrunkupai, kala Jesuku Christaku ala-alangku paṭani paluru malaku pitjanytjaku. Ka Timitji nyuntu panya ngayuku katja mulapa purunypa, panya Tjukurpa Palya Jesunyatjara kulira mulamularingkunytjatjanu.

Ka Mama Godalu Mayatja Jesulu Christalu kulu nyuntunya pukultju pulṅangku kanyinma munu nyuntunya kurunpa rapara pukulmanama ngaltunytju pulṅangku.

Ngunti Wangkawiyangku Wantinytjaku.

³ Uwa Timitji, mungaṭu panyaṅa nyuntunya ngura pala Ipitjala markura wantikatingu ngayulu ngura Matjatunyalakutu ankunytjikitjangku. Ka nyuntu rawaṭu nyinama panya ngura pala Ipitjala wati kutjupa tjarangku tjukurpa kurakura tjuṭa ngunti wangkapai. Ka nyuntu uti tjananya painma alatjitu ngunti wangkawiyangku

wantinytjaku. ⁴ Panya tjanaya kunyu wangkara kulilpai miri ini tjuṭa munuya irititja tjuṭanguṛu wangkara wanṭalpai miri kuwaritja tjuṭakutu, munuyanku tjukurpa ngunti tjuṭa palunya tjananyatjara wangkara wanṭipai. Ka tjananya paila ngunti kulilwiyangku wantinytjaku panya kutjupa tjuṭangku tjanala kulira ngaparku wangkara mirpanṭaripai. Munu panyaya palulanguru, tjukurpa nyanga kurakura tjuṭa kulira Godalu anṅangu tjuṭa wankarṅunkunytjatjara puṭu kulilpai. Palu panya Jesuku Christaku mulamularingkula kutju tjana Godalu wankarṅunkunyangka kulilku.

⁵ Uwa, wangka tjananya Godala wanganṅarangku kulira mukulya ngalitṅunytju pulka nyinanytjaku. Panya tjana wiru kutju kulintjatjanu munu tjukaṛuru nyinanytjatjanu Godala mirangka kunṭa wiya nyinaku kurunpa rapa munuya palulanguru kutju mukulya mulapa nyinaku Jesuku pulkara mulamularingkula. Nyanga palulanguruna nyuntunya wangkanyi tjananya wangkara paintjaku, panya tjana kulira mukulya mulararinytjaku. ⁶ Palu kuwariya kutjupatjara palu purunypa nyinanytja wiya. Munuya palya wantira tjukurpa ngunti ngaparku wangkanytjatjanu kawankatingu. ⁷ Paluru tjana tjukurpa panya Godalu Mosenya ungkunyntja anṅangu tjuṭa nintintjikitja mukuringanyi. Palu tjanaya ninti mulatupalku tjukurpa kutjupa kutjupa watarkungku wangkapai. Paluru tjana ngurpa alatjitu Godaku tjukurku.

⁸ Ka nganaṅa panya kulini tjukurpa nyanga Mosenya ungkunyntjanya palya ngaranyi anṅangu tjuṭa kulira tjukaṛuru nyinanytjaku. ⁹ Munula kulini tjukurpa nyanga paluru ngaranyi anṅangu kurakura tjuṭaku tjana nyakula nintiringkula kura wantira palyanyku nyinanytjaku. Tjukurpa paluru palyanyku nyinapai tjuṭaku wiya, palu panya kuralpai tjuṭaku kutju, panya Godala tun-

gunpungkupai tjuṭaku, kura pampulpai tjuṭaku, Godaku kuraringkupai tjuṭaku, analpai tjuṭaku kulū, munu mama ngunytju miripungkupai tjuṭaku munu miriputju tjuṭaku kulū tjukurpa nyangatja ngaranyi. ¹⁰ Tjukurpa nyanga Godalu Mosenya ungkunyntja mulapa ngaranyi anangu kura tjuṭaku, panya kampangkatu ngaripai tjuṭaku, munu wati panya watingka kampangkatu ngaripai tjuṭaku, munu anangu ngulutjingara witera katipai tjuṭaku, munu ngunti wangkapai tjuṭaku, munu kutjupa kutjupa palyalpai tjuṭaku kulū. Panya paluru tjanaya Godaku tjukurpa mulapa wangkanyangka kulira wantipai. ¹¹ Palu Mama Godalu panya nganmanyntju Mosela tjukurpa pulka wangkangu mununi kuwari malangka tjukurpa nyanga wiru Jesunyatjara wangkara wituṅu anangu tjuṭangka tjakultjunkunytjaku. Palu tjukurpa nyanga paluru pula panya Moseku munu Jesuku mauntalpa ngaranyntja wiya tjungu alatjitu ngaranyi kutjutu. Mulapa Godanya wiru mulapa pitalytji pulkanya miral-miralpa alatjitu. Panya paluru tjukurpa wiru mulapa palyanu nganana kulira pukularinyntjaku.

Paulanya Godaku Pukularinyntja

¹² Kana ngayulu mulapa nganampa Mayatja Jesunya Christanya mirawaninyi. Panya paluru-manṭuni kurunpa rapara kanyini palumpa pulkara warakarinyntjaku. Kana palunya ngayulu pulkara mirawaninyi ngayunya ngurkantankunytjitjangka. Panya paluruṅi ngayunya nyakula kulinu, “Wati nyangangkutju ngayuku warka wanganarangku kulira palyalku.” ¹³ Palu nganmanyntjuna palunya kuranmanangi mununa ananangi, mununa palumpa walytja tjuṭa kulū kurara pungangi. Katju Godanya ngayuku nyakula ngalturingu, panya watarkungkuṅa

kura palyaningi palumpa mulamularingkuwiyangu.
¹⁴ Ka panya Mayatja Jesulu ngaltunyutju pulkangu
 ngayula wirkara nintinu palumpa pulkara
 mulamularingkunyutjaku. Mununi nintinu mukulya
 pulka nyinanytjaku, panya paluru mukulya pukultju
 pulka nyinanyi, palu purunypa.

¹⁵ Ka kulila wangka nyangatja,

“Jesunya Christanya mantakutu pitjangu anangu tjuta
 kura palyantjitjanguru wankarunkunyjtikitja.”

Wangka nyanga paluru mulapa alatjitu, ngana
 wanganarangu kulira mulamularingkunyutjaku.
 Palu ngayulu panya kura pulka mulapa palyaningi
 uwankarangka waintara. ¹⁶ Kani panyatja nyaaku Godalu
 nganmanytju ngaltunytjungku kanyiningi kura mulapa
 rawangu palyannyangka? Wiya, paluru panya
 kura pulkatjara purkarangu kanyiningi anangu kutjupa
 tjutangu ngayunya nyakula mulapa kulintjaku, munu
 tjana ngapartji Jesuku mulamularingkunyutjaku.
 Panya tjana tjinguru ngayunya nyakula kulilpai,
 “Munta, nyangatja panya nganmanypa kura mulapa
 nyinangi. Ka Jesulu Christalu palunya purkarangu
 nyakukatingi munu panya palunya mulapatu kampa
 kutjupara wankarunu kura pulka palyantjitjanguru.”
 Alatjiya tjinguru tjana nyakula kulilku munuya
 palulanguru tjana ngapartji kulira Jesuku
 mulamularingkula palumpa walytjaringkuku
 munuya wankaru rawa mulapa nyinaku.
¹⁷ Wanyula palunya mirawanima panya iritinguru
 alatjitu Mayatja pulka nyinanytjanya. Paluru
 panya Mayatja nyinara wiyaringkunyutja
 wiya titutjara alatjitu wanka nyinaku.
 Ka panyala nyuntu ngana palunya putu
 nyanganyi arkayi nyinanyangka. Palu
 paluru kutju Mayatja pulka, kutjupa
 palu purunypa nyinanytja wiya alatjitu.
 Kala wanyu palunya kutju-kutjura rawangu

walkunma pitalytji pulkanya. Uwa mulapa!

¹⁸ Palu Timitji, nyuntu ngayuku katja purunypa nyinanyi. Kana tjukurpa nyangatja nyuntula wangkanyi nyuntu wanganarangku kulintjaku. Panya tjukurpa nyanga palunya Godaku wangkatjara tjutangu nyuntula nganmanytju wangkangu. Kana nyuntunya wituwitu ni tjukurpa panya paluru tjana wangkanytjitja watarkuriwiyangu kulintjaku. Panya nyuntu tjukurpa nyanga palunya wanganarangku kulira palyarampa Godaku wara wirura rapangu palyalku, munun anangu panya ngunti wangkapai tjutaku nguluringkuwiyangu tungun-tunguntu pailku.

¹⁹ Uwa, rawa Jesuku Christaku kulira mulamularingama paluru nyuntumpa anga-ilunytjitjaku, munu palulanguru rawa kunta wiya nyinama wirura palyanyku nyinara. Panya kutjupa tjutangkuya kura palyantjatjanungku kuntaku ngurparingu munuya kuntatjaramunungku kura palyalkatinyi rawangu. Palulanguruya Godaku tjukurku watarkurira kutjupa kutjupa tjuta kutju kulini, Jesuku Christaku tjukaruru mulamularingkuwiyangu. ²⁰ Panya wati Aimanatjinya pula Alikatjantanya palu purunyaringu. Kana pulanya wantira Satanta kurakutu ma-walatjunu panya pula pina alaringkula Godanya kuranmankunytja wiyaringkunytjaku.

2

Inmangka Nyinara Tjukarurungku Palyantjaku

¹ Kulila! Nganmanytjuna nyangatja wangkanyi. Utila Godala pulkara tjapinma anangu uwankaraku, tjanampa pulkara pukularira. ² Munula uti nguraku mayatja pulka tjutaku, munu mayatja kutjupa tjutaku kulu tjapinmatu. Kalanya tjana tjinguru wirungku

kanyinma nguluringkunyitja wiya rapa pukulpa nyinanytjaku, nganaṅa Godala mirangka tjukaruru nyinanytjaku. ³ Panya nganaṅa alatji rawangku palula tjapinnyangka Godanyalampa kulira pukularinyi, wankarunkupainya panya. ⁴ Panya paluru pulkara mukuringanyi anangu uwankara wankarunkunyitjikitja nganaṅa tjukurpa mularku nintiringkunyitjaku. ⁵ Panya mulapa Godanya kutju nyinanyi. Kutjupa palu purunypa nyinanytja wiya alatjitu. Ka anangu uwankara kura nyinara palula ilaringkunyitja wiyatu. Palu panya wati kutjungku nganaṅanya Godala tjungulpai palula kalypa nyinanytjaku, wati panya Jesulu Christalu. ⁶ Panya anangu uwankarangku kura tjuṭa palyantjitjanguṛu paluru ngalkilarira anga-ilungu nganaṅa karalyarira wankaringkunyitjaku. Panya nyara palula arangka Godalunku nganmanytju kulintjatjanungku wituṅu palumpa katja kutjukurutja, ka mulapa paluru pitjala nganampa ngalkilpa anga-ilungu anangu uwankara wankarunkunyitjikitja. ⁷ Palu nyara palulanguṛuṅi Godalu wituṛa iyanu ma-pitjala anangu uwankarangka wangkara tjakultjunkunyitjaku. Palu ngayulu ngunti wangkanytja wiya, mulapaṅa wangkanyi, panya mulapa Godaluṅi wangkangu tjukurpa mulapa nyangatja tjanala nintintjaku tjana kulira Jesuku Christaku mulamularingkunyitjaku.

⁸ Uwa, kana mukuringanyi anangu tjuṭa nyanga purunypa inmaku tjungurungkula palyantjaku utiya wati wirungku mara katuringkula Godala tjapinma. Munuya uti tjananku pikangku ngaparku wangkanytja wiyangku piluntu Godala tjapinma mirpanarinytja wiyangku. ⁹⁻¹⁰ Kaya minyma tjuṭa uti kanany-kanany pa nyinanytja wiya. Panya kutjupa tjarangkuya mani pulkangka ulytja wiru tjuṭa payamilara tjarpapai anangu tjuṭangku

nyakula wirunmankunytjaku. Munuyanku mangka kutjupankupai, munuyanku apu gold munu upula purunypa wiru tjuṭa mantjira liringka marangka kulu tanpalpai tjuṭangku nyakunytjaku. Palu utiya minyma Godaku walytja tjuṭangku palu purunytju kulintja wiyangku wantira palyanyku nyinara warakarima munuya anangu tjuṭa wirura alpamilanma. Panya palu purunypa palyannyangka Godalu nyakula pukularipai munu kulilpai tjana palyanyku warakarinytja wiru mulapa.

¹¹ Palu uti minyma inmangka nyinarampa pilunpa nintiringama palurunku mirawaninytja wiya. ¹² Panya ngayulu minyma pailpai paluru wati tjuṭangka Godaku tjukurpa nintinnyangka nyakula. Utiya minyma tjuṭangku wati tjuṭaku mayatjarinytja wiyangku wantira pilunpa nyinama. ¹³⁻¹⁴ Panya Godalu wati Adamanya nganmanytju palyanu munu malangkalta minyma palyanu, Eve-anya panya. Ka panya minyma palunya lirungku ngunti kuranu, ka panya kulira mulamularingu titura munu Godala tungunpungu. Ka wati panya Adamanya lirungka mulamularingkunytja wiya. Pala palulanguruna minyma tjuṭa pailpai wati tjuṭangka nintintjaku wiya, tjana wati tjuṭaku mayatjarinytjaku-tawara. ¹⁵ Palu Godalu minyma wankarunkuku paluru iti kanyinnyangka, munu paluru Jesuku Christaku titutjara mulamularingkunyangka, munu anangu tjuṭaku mukulyangku palyannyangka, munu tjakaruru nyinanyangka pilunytju wirura nyinanyangka kulu palunya wankarunkuku.

3

Jesuku Walytja Tjuṭa Atunymara Kanyintjaku

¹ Palu nyangatja waraka wiru mulapa panya Jesuku walytja tjuṭa atunymara kanyintja. Ka watingkumpa

waṛka nyanga palunya palyantjikitjangku kulira waṛka wiṛu mularku mukuringanyi. Uwa, tjukurpa nyangatja mulapa. ² Palu utiya Jesuku walytja tjuṭa aṭunymankunytjaku ngurkantara tjunama wati palya mulapa kura palyalpai wiya. Uti paluru kuri kutjutjara nyinama. Munu uti paluru mirpanarirampa purkarangku kutju wangkama waṛuringkunyitja wiyangku, munu pina wiṛungku kulira palyanma, munu palyanyku nyinama. Munu uti paluru malikitja pitjanyangka nyakula pukularira altira palumpa ngurangka tjunama. Munu uti paluru Godaku tjukurpa tjukarurungku nintilpai nyinama. ³ Uti paluru tarangkaripai wiya, pika pungkupai wiya kalypa nyinama pilunpa, mirpan-mirpanpa wangkanytja wiya. Paluru uti maniku pulkara mukuringkuwiyangku wantima. ⁴ Mununku uti kuri, tjitji kulu aṭunymara wiṛura kanyinma, munu tjitji palumpa tungunpungkunytjaku-tawara wiṛuratu kanyinma, tjitji paluru tjana wanganarangku mama walkuntjaku. ⁵ Panya wati paluru kuri, tjitji kulu putu palyanyku kanyirampa palu purunypatu putu Jesuku walytja tjuṭa palyanyku kanyilku.

⁶ Palu utiya wati panya nganmanypa Godaku walytjaringkunyitja tjuṭa kutju tjunama Godaku walytja tjuṭa aṭunymara kanyintjaku. Munu wati kuwari kutju Godaku walytjaringkunyitja tjunkuwiyangku wantima, panya paluru anangu tjuṭa kuwari kutju kanyira tjinguru kanany-kananyarira walytjangku mirawaniku palurunku. Ka Godalu palunya nyakula kuranmankuku munu wantiku alatjitu palunya. Panya nyanga palu purunypa iriti Godalu mamu Satannga ilkaringuru waningu palurunku ngarala kanany-kananytju mirawaninyangka.

⁷ Ka panya anangu watarkitja tjuṭangku tjinguru wati Jesuku walytja kutjupa nyakula ngurkantanama wiru nyinanytja. Kaya Jesuku walytja tjuṭangku uti wati pala palu purunypa ngurkantara tjunama tjananya wirura atunymara kanyintjaku. Panya wati wiru nyanga purunypa tjunkunyangkaya watarkitja tjuṭangku nyakula palunya puṭu kura ngurkantara wantiku wati palya mulapa nyakula. Kayanku Jesuku walytja tjuṭa palumpa kunṭa wiya pukulpa alatjitu nyinama. Ka mamungku panya palunya puṭu mukumukura puṭu tariltjingara wantiku. Pala palula-tawaraya Jesuku walytja tjuṭangku uti wati palya mulapa ngurkantara tjunama tjananya atunymankunytjaku.

Jesuku Walytja Tjuṭa Alpamilantjaku

⁸ Palu kulila! Utiya palu purunypaṭu wati palya mulapa ngurkantara tjunama Jesuku walytja tjuṭa alpamilantjaku. Wati panya ngunti-wangka tjunkuwiyangku wantira Godaku mukulyatjara kutju tjunama. Palu uti wati paluru waina pulkara tjikilwiyangku wantima munu maniku manyuringkunytja wiya nyinama. ⁹ Munu uti paluru unngu tjukarurungku kulinma yaaltji palya, yaaltji kura, munu Tjukurpa Palya Godalu nganana utintjitja kanyinma alatjitu kulira wantinytja wiyangku. ¹⁰ Palu utiya wati alpamilalpai tjunkunytjikitjangku arkanma-warara munu palya mulapa kutju nyinanyangka nyakula ngurkantara tjunama tjukarurungku, ngunti-ngunti warpungkula tjunkunytja wiyangku.

¹¹ Ka wati alpamilalpaiku kuri kulū uti palyanyku nyinama kutjupa kutjupa tjuṭa kulintja wiya, munu anangu kutjupa tjuṭangka tjukurpa kura paratjakultjunkuwiyangku wantima. Uti paluru wirura

nyinama munu tjukaꝛurungku kutju wangkama aꝛangu tjuꝛangku palunya nyakula ngukaꝛa kuranmankunytjaku-tawara. ¹² Ka wati alpamilalpai uti kuri kutjutjara nyinama mununku kuri, tjitji kulu tjukaꝛurungku aꝛunymaꝛa kanyinma. ¹³ Ka wati panya alpamilalpainya wiruꝛa palyanyku waꝛkarinyangka nyakulaya Jesuku walytja tjuꝛangku palunya mirawaꝛiku. Ka palulanguꝛu alpamilalpai panya paluꝛu Jesuku Christaku mulamularingkunytjatjanungku tjukurpa Jesunyatjara aꝛangu tjuꝛangka kuꝛta wiyangku rapangku tjakultjunkuku.

Tjukurpa Kumpilitja Utiringkunytja

¹⁴⁻¹⁵ Uwa, ngayulu mukuringanyi kuwari ma-pitjala nyuntunya nyakunytjikitja. Palu rawaringkunytjaku-tawaraꝛa lita nyangatja walkatjunanyi nyuntumpa. Kan lita nyangatja mantjira nyakula kulilku panya nganaꝛa Godaku walytja tjuꝛta uti yaaltji-yaaltji palyanyku nyinama. Panya nganaꝛa God panya wankaku walytjar-ingkula uwankara kutjuringu, munu panyala tjukurpa Jesunyatjara tjukaꝛurungku kanyini kulira tjukaꝛurungku wangkanytjikitjangku. ¹⁶ Nganampa tjukurpa kumpilitja, palu wiru mulapa panya kutjupangku nguntinmankunytjaku wiya. Nyangatja panya tjukurpa kumpilitja paluꝛu, Panya Godanya aꝛangurira tjanala nyinangi aꝛangu tjuꝛangka.

Ka Kurunpa Milꝛmilꝛtu utinu tjananya, “Nyangatja mulapa.”

Ka angelpa tjuꝛangku nyangu palunya mantangka nyinanyangka.

Kaya aꝛangu tjuꝛangku tjukurpa palunyatjara parawangangi ngura kutjupangka kutjupangka manta winkingka.

Kaya manta lipiwanungku kulira palumpa mulamularingu.

Ka palumpa mamangku palunya mantjira katingu ngura ilkaritjakutu.

4

Ngunti Wangkapai Tjuta

¹ Palu kulila! Kurunpa Milmiltu utingku wangkangu panya ngula kunyu anangu kutjupatjara Jesuku Christaku mulamularingkunytja wiyaringkuku nganmanytju panya kulintjatjanu. Munuya kunyu mamu ngunti wangkapai tjutangka kulilku wanganarangku palumpa tjanampa tjukurpa tjutaku kutju mulamularingkula. ² Palu tjukurpa pala mamu tjutaku wati ngunti-wangka tjutangu para-tjakultjunkupai anangu tjutangka. Nyanga paluru tjana panya mamutjarangku alatjitu rapangku wangkapai kunta wiyangku. ³ Panya tjanaya kunyu wangkapai watingku kuri altinytja wiyangku wantinytjaku, munuya piruku wangkapai mai kuka tjara kutjupa ngalkuwiyangku wantinytjaku. Palu utila nyanga tjananya kulilwiyangku wantima, panya Godalu mai kuka palunya tjananya ngalkuntjaku mantangka tjunu. Munu panya paluru mukuringanyi Jesuku walytjapitingku mai kuka palunya tjananya ngalkuntjikitjangku palunya-warara walkuntjaku panya maiku kukaku pukularira. Godalu panya mai kuka ngalkuntjaku tjunu palumpa walytjapitiku, panya paluru tjana tjukurpa mularku walytjaringu. ⁴ Panyatja-mantul tjuta mulapa Godalu palura wantingu, ka uwankara wiru mulapa ngaranyi. Kala uti wantiwiyangku pukultu mantjinma Godanya-warara walkura. ⁵ Mai kuka uwankara paluru palura palyanmanu nganaa ngalkuntjaku. Munu paluru

pukulāripai nganaṅa ngalkuntjikitjangku palunya-
warara walkunnyangka munu nganampa nyakula
mirpanarinytja wiya.

*Tjukurpa Tjuka*rurungku Wangkanytjaku

⁶ Timitji, nyuntu tjukurpa nyanganpa Jesuku walytja
tjuṅangka tjakultjura tjananya tjukaṛurunma. Ka
palulanguru nyuntu nyanga alatjingannyangka Jesunya
Christanya nyuntumpa pulkara pukulariku mununta
nyuntunya kulilku palumpa wiru mulapa palyantja.
Panya nyuntu Godaku tjukurpa mulapa tjitjingkulpi
kulilkatira maingka purunypa paltjaringkukatingi.
Panya nyuntunya Tjukurpa Palya nintinnyangkan
wanganarangku kulinigi. ⁷ Palu panya kutjupa
tjuṅangkuya ngunti wangkapai tjukurpa kutjupa kutjupa
tjuṅa kulira. Palu tjukurpa nyanga paluru tjana Godaku
wiya, ka nyuntu tjananya kulira wantima. Uti nyuntu
Godala kutju wanganarangku kulinma munu arakara
rawa palyanyku nyinama ma-palya mulararinytjikitja
Godalu nyakula nyuntumpa pukularinytjaku. ⁸ Panya
wati kunpuringkunyitjikitja arakara wirtjapakalpai.
Arkantja nyanga paluru palya, palu uti nyuntu
waintara munkaritja kulinma panya Godanya munu
palumpa tjukurwanungku rawangku arakara kulilkatima
palya mulararinytjikitjangku. Panya nyuntu alatji
arkantjatjanu kurunpa palya mulararira wanka mulapa
titutjara nyinaku kuwari nyanga mantangka nyinara
munu ngula kulu Godaku ngurangka. ⁹⁻¹⁰ Nyanga
palulanguru nganaṅa Godaku tungun-tungunpa pulkara
alatjitu warkarinyi. Panya palumpa nganaṅa pukulpa
mulapa mulamularingkupai God wankaku, panya paluru
uwankara wankarunkupainya. Paluru panya mulapa
anangu palumpa mulamularingkunyangka wankalpai.

Nyangatja mulapa alatjitu, uwankarangku kulira pulkara mulamularingkunyajaku alatjitu.

¹¹ Uwa, tjukurpa nyanganpa tjanala wangkara nintinma tjana kulintjatjanu tjukarururingkunyajaku. ¹² Palu nyuntu panya wati yangupala nyinanyangkaya tjara kutjupangku tjinguru nyuntunya ngunti kulira tjukutjukunmanama. Ka nyuntu alatji wangkanyangka tjananya kulira wantima munu rawa tjukaruru alatjitu nyinama. Ka nyuntu alatji nyinanyangka Jesuku walytja tjutangku tjinguru nyakula nyuntunya purunyarira arakara palya alatjitu nyinaku. Panya nyuntu wirura palyanyku wangkanyangka, munu panya tjukaruru nyinanyangka, anangu tjutaku mukulyangku alpamilannyangka, munu panya Jesuku mulamularingkula rapa nyinanyangka, munu ngunti kuralwiya palya alatjitu nyinanyangka tjana nyakula kulilku munu palu purunypatu arakara nyinaku.

¹³ Ka nyuntu ngayulu malaku pitjanytjaku patara tjanala inmaku pitjala nyinanyangka Godaku tjukurpa nyakula wangkama munu tjananya titutjarangku utira wangkama tjana kulintjaku munu tjananya pulkara nintinma ninti mulararinytjaku. ¹⁴ Ara panyatja watarkuriwiyangku kulinma panya nganmanytjunta tjukurtjara tjutangku nyuntunya kata witera wangkanytja. Ka panya wangkatjarangku tjukurpa nyuntula jakultjunu Godalu nganmanytju palunya wangkanytjitja. Ka panya palula arangka Kurunpa Milmilitu nyuntunya unngu witulyanu nyuntu rapa mulararira palumpa tjukurpa nintintjaku. Ka nyuntunya alatji witulyankunyangka tungun-tunguntu nintinma wantinytja wiyangku witulya palunyatjarangku.

¹⁵ Uwa, Godaku tjukurpa tjanala wangkara pulkara nintinma. Munu uwankara ngayulu nyuntunya

wangkara wantinytja wanganarangu kulira palyanma rawangu pakuringkunyitja wiyangu. Kantaya tjuṭangu nyakuku nyuntu alatji tjukarurungku palyannyangka, munuya kulilku, “Mulapa nyangatja ma-nintipukaringkula wiru mulararinyi.”¹⁶ Palu nyuntunku kulira atunyanama tarilarantjaku-tawara, tjukaruru nyinanytjikitjangku. Munun anangu tjuṭangka tjukarurungku nintintjikitjangku atatjura kulinma tarilarara ngunti wangkanytjaku-tawara. Ala Timitji, titutjara alatjitu tjukaruru nyinama ngatalpa pakuringkunyitja wiya munu palu purunytjutu titutjarangu tjanala tjukurpa nintinma tjukaruru mulatu. Panya nyanga purunymankunytjatjanungkun nyuntunku wankarunkuku nyuntu panya nintilpai tjuṭa kulu.

5

Jesuku Walytja Tjuṭa Tjukaruru Nyinanytjaku

¹ Ka wati tjiṭpingku tjinguru kura palyannyangka nyuntu uti palunya pulkara paintja wiyangu purkarangu kalypangu wangkama panya mamangka purunypa. Munu nyuntu uti wati yangupala tjuṭangka wangkama kutangka purunypa pauntjinalwiyangu.

² Munu panya minyma pampa tjuṭangka wangkama ngunytjunga purunypa, purkarangu. Munu kungkawara tjuṭangka wangkama kangkurungku purunypa atatjura. Munu palula tjanala tjukaruru kunta-kunta nyinama wirura.

Minyma Wanakala Tjuṭa Wirura Kanyintjaku

³ Palu Timitji, nyuntu munu Godaku walytja tjuṭangu uti minyma panya wanakala kutju mulapa nyinanyangka wirura kanyinma walytja panya wiyatjara. ⁴ Palu

panya wankala katja untalpatjara munta pakali puliritjara nyinanyangka, uti paluru tjananku kanyinma walytjangku. Panya minyma paluru tjananya tjitjilpi atunymara kanyiningi, kaya uti tjana ngapartji palu purunypatu atunymara kanyinma wanakalarinyangka. Ka panya alatjingannyangka Godalu nyakula pulkara pukularinyi. ⁵ Ka minyma wanakala walytja wiya kutju nyinaranku Godanya kulira pukularipai munu mungawinki mungangka kulu Godala tjapilpai palunya atunymara kanyintjaku. ⁶ Palu wanakala panya pirtjiwara nyinanytja ngaltutjara, kurunpa wiya purunypa nyinanyi watarku, wankakitja wiya. ⁷ Ka nyuntu uti tjanala wangka Godaku panya walytja tjuangka wanakala tjuata atunymara kanyintjaku. Ka tjana wanganarangku atunymara kanyinnyangkampa kutjupa tjuangka kuranmankunytjikitjangku kulintjatjanungku wantiku nyakula, “Munta, wirura nyangantu kanyini.” ⁸ Palu Godaku walytjangkumpa tjinguru palumpa walytja tjuata atunymankunytja wiyangku wantirampa, nyara paluru Godanya kulu wantinyi palumpa mulamularingkunytja wiyangku. Munu paluru watarkitja tjuangka waintara kura mulapa nyinanyi Godaku walytja wiya purunypa.

⁹ Palu kulila! Panya nyura Jesuku walytja tjuangka minyma wanakala ini tjuata walkatjunkturpai tjananya atunymara kanyintjikitjangku munu wanakala paluru tjana Jesuku warkarinytjaku. Palu utiya pampa tjuata kutju tjunama panya yiya 60 nyinanytjitja tjuata kutju, munu yiya 60-ngka tjangati nyinanytja tjuata tjunkunytja wiyangku, nampa panya palula munkaritja nyinanytja tjuata kutju tjunama. Munu wanakala paluru tjana nganmanypa kuri walytjangka kutju tjukaruru nyinanyangka ini walkatjunama. ¹⁰ Munu wiru palyan-

nyangka kutju ini walkatjunama panya tjuťangku nyakula mirawaninytjanya. Panya minyma nyanga purunytju tjitjinku wirura unglyira kanyilpai, munu malikitja nyakula ngura palumpangka wirura tjarpatjura kanyilpai, munu Jesuku walytja tjuťaku warķa kurakura mukulyangku wirura palyalpai, munu ngaltutjara tjuťa alpamilara atunymara kanyilpai, munu wiru tjuťa kutju palyalpai. Uwa, minyma wanakala nyanga palu purunypa kutju ini tjunama, palyanyku nyinanytja panya.

¹¹ Palu uti nyura minyma wanakala tjukutjuku tjuťa ini walkatjunkunytja wiyangku wantima. Panya paluru tjana tjinguru ngula kuriku mukuringkula palulanguru Jesuku warķa kulira palyantja wiyangku wantiku. ¹² Kaya kutjupa tjuťangku nyakula ngukara wangkaku, “Wiya, nyura ngunti wangkapai!” Ka Jesunya kulu nyakula tjanampa pukularinytja wiya. Panya tjana nganmanytju ngunti kalkunu Jesuku warķarinytjikitjangku, munu wiyaringkula wantingu. ¹³ Panya wanakala paluru tjanaya warķa wiya para-ngarala akatjari kutju para-nyinapai munuyanku tjapira kulilpai tjukurpa palumpa tjananku kutju wangkanytjikitjangku. Munuya pakara ma-pitjala kutjupa tjuťangka ngapartji nyinara tjukurpa kurakura tjuťa utira para-wangkapai. Utiya tjukurpa kurakura tjuťa para-wangkanytja wiyangku wantima.

¹⁴⁻¹⁵ Pala palula-tawara ngayulu kulini utiya wanakala tjukutjuku nyinapai tjuťa kuritjararingama munu tjitjararingkula ngura tjananku wirura kanyinma. Palu panya watarkitja tjuťangku nganananya Jesuku walytja tjuťa mala kuranmankunytjikitjangku arķara nyanganyi mirpanťu. Alatji kuliraya tjinguru nyanganyi, panya wanakala kutjupa tjuťangku Jesunya wantira Sata-tanta junguringu, kaya panya palulanguru tjinguru nganananya kuranmananyi mirpanťu panya tjuťangku.

Palu panya wanakala tjuṭaya wirura nyinanyangkampa mirpanṭju panya tjuṭangku nganaṅanya kuranmankunytjikitjangku kulira wantiku.

¹⁶ Palu wanyu piruku kulila wanakala panya tjuṭa kanyintjikitjangku. Panya minyma Godaku walytjangku uti palumpa walytja wanakala nyinanyangka palunya wirura atunymara kanyinma Jesuku walytja kutjupa tjuṭangku ma-kanyintjaku-tawara. Panya paluru tjana uti wanakala walytja wiya mauntalpa nyinanytja tjuṭa kutju kanyinma.

Tjukurtjara Tjuṭa

¹⁷ Ka panya ilta kutjupa tjuṭangku Jesuku walytja tjuṭa wirura atunytju kanyilpai, munuya kutjupa tjuṭangku Godaku tjukurpa tjanala tjakultjunkupai munuya tjanala nintilpai tjukarurungku kulintjaku. Kaya uti ilta palunya tjananya ngapartji pulkara mirawanima munu tjananya maningka payamilanma tjanala wirura palyanyku warkarinyangka. ¹⁸ Panya nyiringka iriti walkatjunkunytja ngaranyi nyanga alatji,

“Nyuntu tjinguru puluka ukiri uninytjarangka warkamilani kantura pirpuntankunytjaku uninypa tjuṭa kutju mantjintjikitjangku. Palu alatji warkamilara puluka palunya tjaa karpintja wiyangku wantima, ka warkarira mai tjukutjuku palya ngalkukatima.” *

Munu panya wangka kutjupa palu purunypa ngaranyitu nyanga alatji,

“Mayatjangku uti anangu kutjupa palumpa warkarinyangka mani ungama war kanguru.”

Kaya uti Jesuku walytja tjuṭangku tjukurpa nyangatja kulinma, munuya tjukurtjara tjuṭa, ilta tjuṭa kulu palu purunypatu mani ungama tjanampa wirura

* 5:18 Deuteronomy 25:4

war̄karinyangka. ¹⁹ Ka t̄jinguṛu aṅangu kutjupangu nyuntula pitjala ngukaṛa wangkaku, “Wati tjukurtjara nyaratja kura mulapa.” Nyanga alatji kutjungku ngukaṛa wangkanyangka kulilwiyangu wantima. Palu t̄jinguṛu maṅkurtu pitjala tjukaṛurungku ngukaṛa wangkanyangka kutju kulira mulamularingama. ²⁰ Munu panyan wati tjukurtjarangu, t̄jinguṛu iltangu, rawangu kura palyannyangka nyakula Jesuku walytja t̄juṅangka mirangka palunya wangkara painma. Kaya tjukurtjara kutjupa t̄juṅangu, ilita t̄juṅangu kulu painnyangka nyakula kura palyantjaku nguluringkuku munuya palyanyku nyinanytjikitjangku kulilku.

²¹ Uwa, ngayulu nyanga nyuntunya uwankara wangkara wituwituṅi. Ka nyuntu wirungku kulinma uwankara palyantjikitjangku. Panya ngayulu nyangaṅa nyuntunya wangkanyi Godala mirangka, munu Jesula angelpa t̄juṅangka mirangka kulu. Ka nyuntu nyangatja kulira aṅangu Godaku walytja uwankara wangkara tjukaṛurunma mauntara tjarangka kutju wangkanytja wiyangu, uwankarangaṭu wangkama.

T̄jinguṛu kutjupangu kura palyaṅi, ka nyuntu wangkara tjukaṛurunma munun t̄jinguṛu piṛuku tjukurtjarangu, t̄jinguṛu iltangu kura palyannyangka nyakula palu puṛunytjuṭu wangkara tjukaṛurunma, tjukurtjara munu ilita nyinanyangka wantinytja wiyangu. Munu kutjupa-ara unytjungku paintja wiyangu wantima wiruṛa nyinanyangka. Palu uwankara palu puṛunytju wangkara tjukaṛurunma uwankarangu tjukaṛurungku kulintjaku.

²² Munu wati kutjupa Godaku war̄karinytjaku warpungkula ngunti tjunkuwiyangu wantima. Panya nyuntu warpungkula ngurkantara tjunkunyangka t̄jinguṛu mala kuraringkuku, ka nyuntu kulu kura pala

palula tjunguringkuku panya nyuntu warpungkula ngurkantaṛa tjunu. Pala palula-tawara nyuntu uti tjukaṛurungku kulinma munu purkaṛangku ngurkantanama wati palya kutju, munu palulanguru kutju wati palula maṛa tjunkula milmilmanama Godaku waṛka palyantjaku.

²³ Uwa Timitji, nyuntu panya tjuni ilaṭu-ilaṭu pikatjararinganyi. Pala palula-tawara nyuntu uti mina kutju tjikintja wiyangku waina tjukutjuku kuḷu tjikinma tjuni palyaringkunyntjaku.

²⁴ Ka panya wati minyima kutjupa tjarangkuya tjuṭa miṛangka utingku kura palyaṇi. Ka Godalu tjananya ngula ngarṭajura kuṛu wangkaku. Palu kutjupa tjarangkuya kampangkaṭu kura palyalpai, palu panya ngula nyara tjana utiringkuku kura palyantjatjanu. ²⁵ Ka palu purunypaya kutjupa tjarangku tjuṭangka miṛangka utingku wiṛu palyalpai. Ka palu purunypaṭu kutjupa tjarangku kumpira nguwanpa wiṛu palyalpai. Palu kumpilitja paluru utiringkuku panya wiṛu palyantja, kaya tjuṭangku kulilku.

6

Waṛkaripai Tjuṭa Tjukaṛuru Waṛkarinyntjaku

¹ Jesuku walytja kutjupa tjuṭa panya mayatjangka unytju waṛkaripai manikitja wiya. Ka Timitji, nyuntu uti tjanala wangka mayatja tjanampa warkira kuranmankunyntja wiyangku wantinyntjaku, munu mayatjangu tjananya wituwitunnyangka pukulṭu wangaṇarangu kulira palyantjaku. Panya tjinguruyanku tjanampa mayatja kuranmankuku, kaya aṇangu kutjupa tjuṭangku kuranmankunyangka kulira Godanya wyanmankuku wangkara, “Ai! Nyara tjana Godaku walytja tjuṭangku warkipai watarkitja

tjuṭa puṛunytju. Tjinguru Godanya mulapa wiya.” Alatjiya tjinguru nyakula kulilku munuya tjukurpa nganaṇa wangkara nintintja kuranmankuku. Ka pala palula-tawara nyuntu uti waṛkaripai tjuṭangka wangka mayatjanka wangaṇara waṛkarinytjaku kutjupa tjuṭanku nyakula Godanya wirunmankunytjaku palumpa tjukurpa kulu.

² Palu mayatja kutjupa tjuṭa panya Godaku walytjaṭu nyinanyi. Kaya tjananya waṛkaripai tjuṭanku tjinguru alatji kulilku, “Nyara ngayuku mayatja Godaku walytja nyinanyi. Wanyu kaṇa tjukutjuku nguwanpa waṛkarima pulkara waṛkarinytja wiya panya paluru ngayuku walytja Jesulanguru.” Alatjiya tjinguru kulilku waṛkaripai tjuṭanku. Ka Timitji, nyuntu uti tjanala wangka nyanga palu puṛunypa kulintja wiyanku wantinytjaku munu mayatjanka kulira wirura pulkara waṛkarinytjaku. Panya mayatja paluru Godaku walytja tjanampa kulu walytja, munu paluru tjanampa pulkara pukularinyi palumpa wirura waṛkarinyangka.

Mani Kulintja Wiya Nyinanytjaku

³ Uwa Timitji, nyuntu uti aṇangu tjuṭangka tjukurpa nyanga palunya tjananya wangkara nintinma. Palu tjinguru wati kutjupanku tjukurpa kutjupa kutjupa nintilku mayatja Jesuku Christaku tjukurpa wiya, nyuntu nganaṇa nintintja puṛunypa wiya. ⁴⁻⁵ Munu wati pala paluru kaṇany-kaṇanypa nyinanyi ninti-palku, palu paluru ngurpa alatjiṭu. Paluru panya nguntingunti ngaparku wangkara nyinara kulintjikitja kutju mukuringkupai. Munu palulanguru paluru mirpaṇ-mirpaṇṭu wangkapai pikanku. Munu paluru aṇangu kutjupa tjuṭa analpai munu kuranmankupai. Panya paluru tjukurpa mulapa kulira wantira pina kuraringkula

pikangu rawangu wangkapai. Munu wati paluru ngunti kulilpai alatji, “Ngayulu tjinguru Jesuku walytja nyinarampa mani pulka mantjilku.” Palu wiya, wati pala paluru ngunti kulilpai.

⁶ Palu panya Godaku walytjangu mantatja kutjupa kutjupa tjuṯa waintara kulilwiyangu wantirampa Godaku iwara kutju wanarampa paluru pukulpa mulapa nyinaku. ⁷ Kulila, nganaṯa wanyu nyaatjara iti ngaringu? Panya nganaṯa kutjupa kutjupa tjuṯa wiya iti ngaringu nikiti alatjitu. Munula ngula ilura nyaa katiku ilkarikutu? Wiya nganaṯa kutjupa kutjupa tjuṯa katinytja wiya maralpa ananyi. ⁸ Ala, pala palunya uti kulinma munula mai, mantara kutju kanyirampa pukulpa mulapa nyinama munula kutjupa kutjupa tjuṯaku waintara pulkara mukuringkuntja wiyangu wantima. ⁹ Palu panya kutjupa tjuṯangkuya maniku pulkara mukuringkuntjatjanungku mamuku wangka kulilpai ngunti arakara wangkanyangka. Munuya palulangu ru ngunti kulira rawangu kura palyalpai mani kutju kulira kura kutjupa kutjupa tjuṯa kulu kulira. Nyara palulangu ruya kura mulararira ma-wiyaringkula ilura kawankatipai. ¹⁰ Panya maniku manyungku-manṯu kura kutjupa kutjupa tjuṯa palyalpai. Panya kutjupa tjuṯangkuya manitjiratjangu tjukurpa mulapa Jesuku mulamularingkuntjatjanungku kulira wantir'iyani munuyanku walytjangu tjuni kuraṯi, unngu kura nyinara.

Timitjinya Wirura Nyinanytjaku

¹¹ Palu Timitji kulila! Palunya tjananya purunyarinytja wiyangu wantima panya nyuntu Godaku wati. Rawangu kulinma Godalawanu tjukaruru palyanyku nyinanytjikitjangu paluru nyakula pukularinytjaku. Munu Jesuku Christaku rawa mulamularingama panya

paluru nganampa ngalkilpa ilunytjitjaku. Munu mukulya pukultju pulka nyinara anangu tjuangka purkarangu wirura wangkama. Munu rawangu Godanya tungun-tunguntu wananna pakuringkunyta wiyangu. ¹² Palu tjukurpa mulapa rawangu palyanyku kulintja panya pulkara wirtjapakantja purunypa. Panya anangu tjuta waintarinytjikitja pulkara wirtjapakalpai winatja wiru mantjintjikitja. Panya tjana purkara wirtjapakantja wiya munu ngururpa tultjarukatinytja wiya panya tjana waintarinytjikitja mukuringkula pulkara alatjitu wirtjapakalpai. Ka Timitji, nyuntu palu purunytju tungun-tunguntu Godanya wananna palumpa tjukurpa kulintjatjanungku munun palulangu ru winatja wiru mulapa mantjilku panya nyuntu wanka mulapa nyinaku Godala tjungu. Panya nganmanytjun tjuangka mirangka wangkangu Jesunya Christanya wanantjikitjangku tjukurpa mulapa kulintjatjanungku. Nyara palula aranta Godalu altingu palulakutu pitjala wanka titutjara rawa nyinanytjaku.

¹³⁻¹⁴ Uwa, Godalu panya uwankaratu wankaru kanyilpai. Kana palula mirangka nyuntula wangkara nyuntunya wituwituni Jesula Christala mirangka kulu. Panya paluru Pontius Pilate-ala ngarala tjukurpa wiru wangkangu mungatu. Uwa, palula pulala mirangka nanta wangkanyi alatji, nyuntu ngayulu wangkara wituwituntja uwankara wanganarangku kulira palyanma rawangu Mayatja Jesunya Christanya malaku pitjanytjakutu-wangkara. ¹⁵ Palu Godalu kutjungku kalkuntjatjanungku kulini yaalara Jesunya malakungku iyantjikitjangku ngananalakutu. Paluru kutju ninti ara nyara palumpa. Ka mulapa nyara palula arangka Jesunya pitjala utiringkuku nganana ala paluru iyannyangka. Panya Godanya Mayatja pulka mulapa wiru alatjitu, mayatja

kutjupa uwankarangka waintara alatjitu nyinanyi. ¹⁶ Panya paluru kutju ilunytja wiya titutjara wanka nyinanyi. Paluru panya tili pulkangka nyinanyi pitalytji pulka mulapa, kala palulakutu putu ilaringanyi. Panya anangu kutjupangku palunya nyakuwiya alatjitu. Paluru kutju Mayatja witulya pulka mulapa anangu tjutangka pulkanmankula mirawaninytjaku rawa mulatu.

¹⁷⁻¹⁸ Ka Timitji, nyuntu uti mani pulkatjara tjutangka wangka kanany-kananypa wiya nyinanytjaku. Utiya paluru tjana mani mantjirampa tjunkukatira pulkantja wiyangku wantima, panya alatji rawangku tjunkula tjana Godaku watarkurira maniku kutju mulamularinganyi. Ka nyuntu tjananya wangka Godanya pulkara kulintjaku kutjupa kutjupa tjuta wiyangku. Panya Godalu kutjungkulanya uwankara ungkupai nganaa pukulpa nyinanytjaku. Ka nyuntu manitjara tjutangka wangka anangu kutjupa tjutaku wiru tjuta palyantjaku, munu tjananya intjanungku ungkunyntjaku. ¹⁹ Panya mantangka nyinara intjanungku ma-ungkulaya tjana Godanya pukulmananyi, maniku mulamularingkuwiyangku wantira. Ka Godalu tjananya ngapartji ngula ngura ilkaritjanga wiru mulapalta ungkuku. Alatji tjana mantangka palyantjatjanu ngula ngura ilkaritjanga wanka mulapa titutjara nyinaku Godala tjungu.

²⁰ Palu Timitji kulila! Panya Godalu nyuntunya tjukurpa ungkunyntjanya tjukarurungku kanyira wangkama. Munu kutjupa tjutangka tjukurpa kurakura ngunti wangkanyangka kulintja wiyangku wantima. Panya tjukurpa palunyaya nyinara ngunti arapungkupai nintingu-palku. ²¹ Panya tjarangkuya tjukurpa palumpa tjanampa mulamularingkula pala palulanguru Jesuku Christaku mulamularingkunyntja wiyaringu ngunti panya kulintjatjanu.

1 Timitjiku 6:21

25

1 Timitjiku 6:21

Uwa alatjituna wangkanyi. Ka Godalu nyuntunya
pukultju pulkangku wirura kanyinma.

Tjukurpa Palya
Portions of the Holy Bible in the Pitjantjatjara language of
Australia

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 19 Oct 2021 from source files dated 22 Nov 2019

b29b7786-0954-5b75-82cb-3657182b63d6